



2. oktober 2025

UKA 2025/25

Kalaallit Nunaanni eqqartuussisarnermik inatsisip aamma Kalaallit Nunaanni pinerluttulerinermi inatsisip allanngortinneqarneri pillugit inatsit (Kalaallit Nunaanni eqqartuussisarnermik inatsimmi malittarisassat il.il. nutarterneqarnerat) pillugu siunnersuummut missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Siumup pingaartilluinnarpaa inuiaat inatsisitigut illersugaanerisa qulakkeersimajuarnissaa. Taamaattumik Siumup eqqartuussiveqarnerup aammalu pinerluttaalisitsinerup pitsanngorsartuarnissaanut nukittorsartuarnissaanullu peqataassaaq peqataajuassallunilu.

Kalaallit Nunaanni Eqqartuussisarnermi aammalu Pinerluttulerinermi inatsit 1. januar 2010 aallarnerfigalugu nutartereerneqarnermikkut atuutilersinneqarput Eqqartuussiveqarneq pillugu Ataatsimiititaliarisup ukiorpaalunni suliaqareernikuunerata kingunerisaannik. Taamaasilluni Kalaallit Nunaanni eqqartuussisoqarnerup tamarmiusup nalilersorneqarnerata kingorna aammalu allannguutissanik siunnersuusiorfigineqarnerata kingorna inuiaqatigiit amerlasuutigut inatsisitigut pitsaanerusumik illersugaaffilerneqarsimanerat piviusunngortinneqarpoq.

Inatsisinik atuutsitsinermut oqartussaaffik ilisimasatsituut Naalagaaffiup ataani suli inissisimavoq, taamaattumillu suliassanut taakkununga tunngatillugu allannguinnissamik imaluunniit siunnersuutitik nutaanik siunertaqartoqartillugu Naalagaaffeqatigiinnermi Oqartussaasut saaffigineqartarput suliakkerneqartarlutillu. Siumup pingaartippaa nunatsinni innuttaasut kikkugaluartulluunniit toqqissisimasumik avatangiiseqarlutik inooqataanissaat, taamaammallu inatsisinik atortitsinermut suliassaqrarfiup iluani pitsanngorsaateqarfiureeraluartumi suli pitsanngorsaatisanik iliuuseqaqataanissaq Siumumi tikilluaqqullugulu suleqataaffigiuarusupparput.

Naalakkersuisut matumani Eqqartuussisarnermik inatsit aammalu Pinerluttulerinermi inatsit arlalinnik allannguuteqarnissaat pillugu inatsisissatut siunnersuut qaqiligaat Siumumiit ilassilluarumavarput, siunnersuutillu amerlanersaat Eqqartuussisarnermik inatsisitsinnut nutarterinerupput, ilaatigut Kalaallit Nunaanni Eqqartuussivinni isumalluutit atorneqarsinnaalernissaannut aamma sulianik sularinnittarnermut piffissap atorneqartartup appartinneqarnissaannut allannguutit peqataanissaat siunertarineqarluni. Tamakku tamarmik nunatsinni innuttaasut sullinneqarnerannut pitsaanerusumik, pilertornerusumik aammalu eqaannerusumik atugassaqartitsissasut Siumumiit naatsorsuutigaarput.



Sivisunerpaamik ulluni 30-ini inissiisarfimmi inissiinissaq eqqartuussutigineqarsinnaatillugu najukkani eqqartuussivinni eqqartuussisut eqqartuussisooqataasut peqataatinngikkaluarlugit suliamik aalajangiisinnaalernissaat siunnersuutip ilaatigut siunertarisaa Siumumi pitsaasutut isumaqarfigaarput, najukkanimi eqqartuussivinni sulianik suliarinnittarnermut piffissat atorneqartartut annertuumik appartinneqarsinnaanissaannut taamaaliorneq kinguneqarsinnaassasoq Siumumi aamma nalileratsigu. Tamanna ukiorpassuanngortuni suliat ilaannut siviluvallaartumik ingerlasarnerannut ajornartorsiummut illuatungileeqataassasoq Siumumi isumaqarfigaarput.

Taamaattumik inatsisitigut innutaasut illersugaaffeqarnerunissaannik aammalu pilertornerusumik sullinneqarnerunissaannik siunertaqarluni alloriarniarneq Siumumiit tamakkiisumik taperserumavarput.

Siumumiit taamatut oqaaseqarluta siunnersuut aappassaaneerneqartinnani Inatsisinut ataatsimiititaliami suliarineqarluni pinissaa innersuussutigaarput.

Anders Olsen, Siumut